



Inatsisartuni ilaasortaq Malik Berthelsen, Siumut
MAANI

**Aatsitassarsiorfinni aamma erngup nukinganik innaallagissiorfinni
aningsarsiaqartitsisarneq pillugu apeqquteqaat 239-imut akissuteqaat**

30. oktober 2012
Sagsnr. 2012-075570
Dok. Nr. 1044289

Aatsitassarsiorfinni aamma erngup nukinganik innaallagissiorfinni
aningsarsiaqartitsisarnermut akileraaruteqartitsisarnernullu tunngatillugu Inatsisartut
suleriaasianni § 37 imm. 1 naapertorlugu Naalakkersuisunut apeqquteqarputit.
Apeqquteqaat suliassaqaarfinni akineqartussanngorlugu innersuunneqarpoq.

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

1.

**Aatsitassarsiorniat kikkunukua nunatsinni SIK-ip akissaataanik minnerusunik
akissarsiaqartitsisoqarsinnaanngippat suliniussuarnik angisuunik
piviusunngortsitsisinaanatik Naalakkersuisunut oqariartuuteqarsimasut?**

Ilisimatitsissutigineqarsinnaavoq London Mining tusagassiuutitigut
nalunaaruteqarsimammat:

- Tunngaviussatut tunngaviatigut Isuani suliassaq Kalaallit Nunaanni inatsisinut maleruagassanullu naapertuuttumik suliarineqassaaq.
- Sulisussanik nunanit tamalaaneersunik atuinissap akuerineqarsinnaanissaa, suliassap piviusunngortinneqarnissaanut pingaaruteqarpoq.
- London Mining Greenland-ip siunertaraa, sulisussat nunanit tamalaaneersut suliassani angisoorsuarni taamaattuni nunani tamalaani suleriaatsini atorneqarajuttartunik aningsarsiaqartinneqarnissaat, immaqa Kalaallit Nunaanni maannakkut aningsarsianut periaasiusartunit appasinnerussallutik imaluunniit taamaassanani.

Alcoa ilisimatitsivoq, aluminiuliorfissamut suliassami sanaartornerup immikkoortuani nunani tamalaani unammillersinnaassuseqartumik sulisoqarnissamut inatsisitigut killilersuinerit sulluunniit suliassap piviusunngortinneqarnissaanut ajornakusoortitsilersussatut ingerlatseqatigiiffiup isigigaa.

2.

**Erngup nukinganik innaallagissiorfiliorfissami immikkut qaffasissumik
ilinniagaqarsimasuunissamik pisariaqartitsiviusuunngitsuni sulisorineqartut
akissaataat qanoq annertutiginersut aammalu sumut akileraartarnersut
Naalakkersuisut ilisimavaat? Akissarsiaat suuppat sumullu akileraartarpat?**

Erngup nukinganik innaallagissiorfiliorfinni sulisunut atuuttut aningaasarsiatigut atorfeqarnermilu atugassarititaasut aalajangersimasut Naalakkersuisut ilisimangilaat.

Erngup nukinganik innaallagissiorfiliornermut atatillugu aningaasarsianut, isumaqatigiissutininut aamma akileraartarnermut immikkut maleruagassanik aalajangersaasoqarsimangimmat imaluunniit immikkut atugassarititaasunik akuersisoqarsimangimmat ilisimatitsissutigineqarsinnaavoq. Taamaattumik naatsorsutigineqarpoq sulisut sulianik ilinniagaqarsimasunut atuuttunik aningaasarsiaqartillugit aammalu taakkununga isumaqatigiissutit tunngavigalugit atorfeqartinneqartut. Oqaatigineqassaaq Ilulissani erngup nukinganik innaallagissiorfiliornermi entreprenøri suliassami sulisut ilinniartullu nunaqavissut amerlassusaat pillugit ukiumoortumik Nukissiorfinnut naatsorsukkanik tunniussisarmat.

Sulisut erngup nukinganik innaallagissiorfiliornermik suliaqartut aallaaviatigut Kalaallit Nunaannut akileraaruteqartussaapput. Taamaattorli sulisut nunanit allaneersut entreprenørip ataani nunanit allaneersuni atorfeqartut, sivikitsuinnarmik Kalaallit Nunaanniissimagunik, Kalaallit Nunaannut akileraaruteqartussaassanngillat.

Sulisunut ataasiakkaanut qanoq annertutigisumik isertitanik A-nik tunniussisoqarsimanersoq qaammatikkaartumik nalunaarummik Akileraartarnermut Aqutsisoqarfik tigusaqartarpoq. Ilimanarpoq sulisut ilai aamma akeqanngitsumik ajunngitsorsiasaqaqartinneqartassasut nerisaqartinneqarlutik ineqartinneqarlutillu il.il. ajunngitsorsiat taakkua isertitaapput B-it. Isertitat B-it sulisitsisumit ukiumut ataasiaannarluni nalunaarutigineqartarput.

Akileraartarnermut Aqutsisoqarfik taamaalilluni sulisunut aningaasarsiaritinneqartut pillugit paasisutissanik tigusaqartaraluartoq, sulisoq qanoq ilinniagaqarsimasuunersoq, sulisup suliassat suut suliarisarnerai, sulisoq nalunaaquttap akunneri qassit sulisimanersoq il.il. nalilissallugu ajornarpoq.


3.

Aasaanerani umiarsuit nunatta avataaniit aalisakkanik tunitsiviusartut inuttaasa akissaataat qanoq annertutiginersut aammalu sumut akileraartarnermut Naalakkersuisut ilisimavaat? Akissarsiaat suuppat sumullu akileraartarpat?

Aalisakkanik tunitsiviusartut nunanit allaneersut inuttaannut aningaasarsiatigut atorfeqartitsinermullu atugassarititaasut aalajangersimasut atuuttut Naalakkersuisut ilisimangilaat.

Inuttat nalinginnaasumik aningaasarsianut akileraarutinut inatsimmi § 2, imm. 1, nr. 17 malillugu Kalaallit Nunaannut akileraaruteqartussaataasussaannngillat.

Inussiarnersumik inuulluaqqusillunga



Ove Karl Berthelsen